


1. Kausu e e latlhegileng



2. Melekorone



3. Go aba go monate




4. Setshwantsho sa popego



# ★ **Buka 1B**

## **Diteng**

1. Kausu e e latlhegileng .....	1
2. Melekorone .....	11
3. Go aba go monate .....	21
4. Setshwantsho sa popego.....	31

 **Motseletsele wa dibuka tsa go ithuta go buisa tsa Mophato wa Motheo**  
E phatlaladitswe ke Molteno Institute for Language and Literacy ka 2014

E duetswe ke Zenex Foundation 

### **Mophato 3 ★ Buka 1B**

- Motlhagisi wa motseletsele: **Jenny Katz**
- Batlhami ba ditlhamane: **Mirna Lawrence le Jenny Katz**
- Dipotso le ditirwana tsa morago ga go buisa: **Jenny Katz**
- Mankge wa puo ya Setswana: **Peter Mekgwe**
- Mogakolodi wa Setswana: **Johanna Mogodiri**
- Batshwantshi: **Rob Owen** - 1. Kausu e e latlhegileng  
**Sandy Lightley** - 2. Melekorone  
**Vusi Malindi** - 3. Go aba go monate  
**Sandy Campbell** - 4. Setshwantsho sa popego
- Boalo le thulaganyokgabo: **Resolution le ihwhiteDesign**

© 2014 ke ya Molteno Institute for Language and Literacy

ISBN 978-1-77580-229-7



Creative Commons Attribution-NonCommercial-NoDerivatives (CC BY-NC-ND) 4.0 International Licence

Disclaimer: You are free to download and share this work as long as you attribute the Molteno Institute for Language and Literacy, but you may not change this work in any way or use it commercially.

# 1. Kausu e e latlhegileng



## PELE O BUISA KGANG

**Tlotlofoko:** tlhomamisa gore o itse bokao jwa mafoko ano pududu, bokhutshwane, bosetlha, tshetlha, segokgo, roromisiwa, itaaganya, ikaega, polokelo, phifadu, botlhapelong, kgaitsadie, kgomaretse

**Ikatiso ya ditumatlhaka:** tlhomamisa gore o itse ditumatlhaka tseno aa, oo, gw, jw, kg, kh, mm, mp, ng, nn, ny, ph, th, tl, ts kgw, ngw, nny, ntl, tlh, tlw, tsh, tsw, nngw, ntsh, tshw

**Ikatiso ya go buisa:** tlhomamisa gore o kgona go buisa mafoko ano latlhegileng, ipaakanyetsa, tshweu, bokhutshwane, tshetlha, itaaganya, botlhapelong, tswetswe, kgaitsadie, itshwara

Modise o ipaakanyetsa go ya sekolong.

O apara hempe ya gagwe e tshweu sekolo, jesi e pududu ya sekolo le borukgwe jo bokhutshwane jo bosetlha jwa sekolo. O apara kausu e le nngwe telele e tshetlha.

Modise o batla go apara kausu e nngwe, mme ga a e bone. O leba ka fa tlase ga kobo. O leba ka fa tlase ga bolao. O leba mo teng ga ditlhako. O leba mo khabotong. Fela kausu ga e bonale.

Modise o ema go sekae gore a akanye. 'Gongwe kausu ya me e mo teng ga lae. Tla ke lebe.'

O atamela oteropo a bo a bula lae.



'Ijoooo!' Modise a goa.

Ga go na kausu mo laeng. Go na le eng moo, Modise o fitlhela segokgo se segolo, se se ntsho se se boboa!

Modise o tswala lae ka go e itaaganya. O ikaega ka oteropo ka gonne maoto a gagwe a roromisiwa ke letshogo. Se mo tshositse tota!




Modise o akanya gape. 'Fa kausu ya me e se mo kamoreng, gongwe ke e tlogetse ka fa boapelong. Ke tla ya go leba.'

Modise o ya ka fa boapelong. O leba fa tlase ga tafole. O leba mo khabotong. O leba fa morago ga dipitsa. Mme kausu ga e bonale.

Morago ga moo Modise a bona lebokoso le le tala la polokelo. 'Gongwe kausu ya me e mo teng ga lone. Tla ke lebe.'


O ya fa lebokosong a bo a bula sekhurumelo.



'Ijoooo!' Modise o a goa.

Ga go na kausu mo lebokosong la polokelo. Go na le eng moo, Modise o fitlhela noga e e phifadu ya mo ntlong e robetse mo go lone!

Modise o tswala sekhurumelo ka go se itaaganya. O ikaega ka lebokoso ka gone maoto a gagwe a roromisiwa ke letshogo. O ne a tshogile go feta pele!



'Kausu ya me ga e mo kamoreng. Ga e ka fa boapelong. Gongwe ke e tlogetse ka fa botlhapelong. Ke tla ya go leba,' Modise o akanya jalo.

Modise o ya ka fa botlhapelong. Kgoro e tswetswe. O bula kgoro fela thata a sa akanye sepe ka gone.





'Ijoooo!' Ausi wa gagwe o goa jalo.

'Ijoooo!' Modise le ene o a goa.

Ga go na kausu ka fa botlhapelong. Go na le eng moo, Modise o fitlhela ausi wa gagwe a tlhapa. Ausi a galefa tota!

Modise o tswala kgoro ka go e itaaganya. O ikaega ka kgoro gonne maoto a gagwe a roromisiwa ke letshogo! Letshogo la gagwe le ne le feta a mangwe otlhe!



Modise o boela ka fa kamoreng ya gagwe. Nako ya go ya sekolong e setse e ile mme o tla nna le bothata go feta fa a apara dikausu di sele.

Morago ga moo Modise o utlwa mongwe a mo goga ka borukgwe. Fa a retologa, o bona kgaitsadie yo monnye Lebo a eme fa morago ga gagwe. O goga sengwe ka fa morago ga borukgwe jwa gagwe. E ka tswa e le eng tota? Modise o itshwara ka fa morago mme ...

*Aaaahh!* Lebo o bone kausu e e latlhegileng! E ne e kgomaretse fa morago ga borukgwe jwa gagwe nako eno yotlhe!



## Kausu e e latlhegileng

### A. Tekotlhaloganyo

Araba dipotso o dirisa dipolelo tse di feletseng.

1. Modise o ne a ya kae? O itse jang?
2. Modise o ne a batla eng?
3. Nyalanya lefelo le se Modise a se fitlhetseng mo go lone:
  - a) lae ka fa kamoreng  noga
  - b) botlhapelo  segokgo
  - c) lebokoso ka fa boapelong  Ausi
4. Ke eng fa Modise a ne a galefetswe ke ausi wa gagwe?
5. Lebo ke mang?
  - a) Ke kgaitsadie yo monnye.
  - b) Ke ausi wa ga Modise.
  - c) Ke tsala ya ga Modise.
6. Kwa bokhutlong, Modise o ne a fitlhela kausu ya gagwe kae?
7. Boammaaruri kgotsa maaka? Modise o ne a batla kausu ya gagwe:
  - a) ka fa morago ga garetene \_\_\_\_\_
  - b) ka fa tlase ga kobo le ka fa tlase ga bolao \_\_\_\_\_
  - c) mo marulelong \_\_\_\_\_
8. O akanya gore Modise o dirileng fa a sena go bona kausu ya gagwe?

## B. Go dirisa puo

DBE Mophato 3 Bukatiro 1: ts 118  
DBE Mophato 3 Bukatiro 2: dits 87, 88

Batla matlhaodi a ka nna mane a mmala mo kgannyeng eno. A kwale le leina le le tlhalosiwang ke mmala mongwe le mongwe, ka sekai:

*bosetlha* → *borukgwe jo bo khutshwane jo bosetlha.*

## C. A re kwaleng

DBE Mophato 3 Bukatiro 1: dits 36, 38  
DBE Mophato 3 Bukatiro 2: dits 18, 86, 106, 109

Itire Modise. Kwalela tsala lekwalo o e bolelele ka kang ya go latlhega ga kausu ya gago.

## 2. Melekorone



### PELE O BUISA KGANG

**Tlotlofoko:** tlhomamisa gore o itse bokao jwa mafoko ano  
phaka, melekorone, diswinki, sereledi, tshipi, tshoga, modikologo, sedidi

**Ikatiso ya ditumatlhaka:** tlhomamisa gore o itse ditumatlhaka tseno  
aa, oo, kg, kw, lw, ng, nn, ny, ph, sw, th tl, ts  
nth, nts, ntš, tlh, tsh, ntlh, tshw

**Ikatiso ya go buisa:** tlhomamisa gore o kgona go buisa mafoko ano  
dintša, tlhamalalo, itshwarelela, kgorometsa, tshwanetse, ntlha, kelotlhoko

Baagi ba tikologo e ba rata go etela phaka. Ba tsamaisa dintša tsa bone mo go yone. Ba nna mo meriting ba bo ba tlotla. Bana ba tla go tshameka bolo.

Gape, bana ba tla go tshameka ka diswinki, sereledi le ka mekorone.



Nunu o goroga mo phakeng. O ya ka tlhamalalo kwa mekoroneng. O o rata thata! O itshwarelela ka tshipi a bo a simolola go taboga, a o kgorometsa thata ka fa a ka kgonang ka gone. Fa mekorone o dikologa, Nunu o tlolela mo go one.



Jin o goroga mo phakeng. O ya kwa go Nunu kwa mekoroneng. Melekorone o a iketla. Jin o tshwara tshipi a bo a toboga a o dikolosa ka bonako. A bo a tlolela mo go one.


Nunu o simolola go tshoga. Ga a rate go dikologa ka bonako. O itshwarelela thata.



Jaanong Jonah o kwa phakeng. Le ene o rata melekore. Jonah o kgorometsa tshipi a bo a taboga a o dikolosa ka bonako le go feta. Jaanong melekore o dikologa ka bonako thata!

Nunu o simolola go lwala. Jin o simolola go tshoga. Ba batla gore melekore o fokotse lebelo.





Maria o goroga mo melekoroneng fa Jonah a tlolela mo go one. Jaanong ke nako ya gagwe ya go tshwara tshipi ya one a bo a taboga. Maria ke mosetsana yo mogolo, yo o nonofileng. O tsamaisa melekorone ka bonako thata. O goa ka boitumelo a bo a tlolela mo go one.

Jaanong Nunu o lwala thata. ‘Emisa! Emisa! Ke batla go fologa!’ a lela jalo.

Jin le ene o simolola go lwala. ‘Emisa! Emisa! Ke batla go fologa!’ o lela jalo.

Jonah le ene o simolola go tshoga. Ke la ntlha a dikologa ka lebelo jaana ka melekone.

‘Emisa! Emisa! Le nna ke batla go fologa!’ o goa jalo.

Maria o leba Nunu. O leba Jin le Jonah.

‘Ijo bathong,’ o akanya jalo. ‘Bananyana ba ba tshwanetse go fologa. Melekone ono o tshwanetse go ema.’


Morago ga moo Maria o bona Kagiso a tla kwa go bone. ‘Kagiso! Tla ka bonako, o tle go nthusa!’ o goa jalo. ‘Re batla go emisa melekone!’



Kagiso a tabogela kwa melekoroneng. O tshwara tshipi ya melekorone a bo a o gogela morago. O somela dinao mo teng ga motlhaba gore a fokotse lebelo la one. Maria le ene o thusa ka go goga lenao mo motlhabeng.



Melekorone o fokotsa lebelo. O dira modikologo wa bofelo o bo o ema. Nunu, Jin le Jonah ba fologa ka kelotlhoko. Ba na le sedidi e bile ba palelwa ke go tsamaya!



‘Nnang mo godimo ga bojang,’ Kagiso a rialo ka bonolo. ‘Lo tla nna botoka.’

Ene le Maria ba tshwara ditshipi tsa melekorone ba bo ba taboga ka lebelo le legolo. Ba tlolela mo go one, ba goa ba tshega fa melekorone o ntse o dikologa o sa eme.

Nunu, Jin le Jonah ga ba kgone go leba! Sedidi ga se ise se fele mo go bone!

# Melekorone

## A. Tekothaloganyo

Araba dipotso o dirisa dipolelo tse di feletseng.

1. Kgang eno e diragaletse kae?
2. Batho ba ya kwa phakeng go ya go \_\_\_\_\_.
  - a) tsamaisa dintša tsa bone
  - b) tshameka bolo
  - c) nna mo meriting le go tlotla
  - d) Tsotlhe tse di fa godimo.
3. Goreng Nunu a ya ka tlhamalalo kwa melekoroneng?
4. Fa o dikologa ka bonako thata mo melekoroneng \_\_\_\_\_.
  - a) o ka nna wa lapa o bo o thulamela
  - b) o ka nna wa ema
  - c) o ka nna wa tsewa ke sedidi le go ikutlwa o lwala
5. Naya dipolelo dinomore go tswa go 1-4 ka tatelano e e siameng ya kgang.

a) Maria o ne a lemoga gore bana ba bannye ba ne ba tlhoka go ntshiwa.	
b) Jin le Jonah le bone ba simolola go lwala.	
c) Kagiso o ne a thusa Maria go emisa melekorone.	
d) Nunu o ne a simolola go lwala mo melekoroneng.	

6. Maria le Kagiso \_\_\_\_\_.
- a) ba ne ba na le maikarabelo e bile ba le bonolo
  - b) ba ne ba batla gore go palame bone fela mo melekoroneng
  - c) ba ne ba lwala mo melekoroneng
  - d) ba ne ba sa tshware bana ba bannye sentle
7. Goreng Maria le Kagiso ba ne ba kgona go dikologa ka bonako mo melekoroneng?

## B. Go dirisa puo

DBE Mophato 3 Bukatiro I: ts 118

Buisa mafoko a a tihalosang (matlhaodi) fa tlase. Tlhopha mafoko a le 4 go tihalosa Nunu, Jin le Jonah. Morago ga moo kwala polelo ya gago e e nang le mafoko ao a le 4.

hutsafala, nnye, golo, nonofile, tshogile, lwala, galefile, sedidi, itumetse, boifa

## C. A re kwaleng

A o kile wa ya kwa phakeng? O dirang teng? O rata go tshameka eng? O tshameka le mang?

Kwala serapa sa bobotlana dipolelo di le 8 o bo o thala setshwantsho.

# 3. Go aba go monate



## PELE O BUISA KGANG

**Tlotlofoko:** tlhomamisa gore o itse bokao jwa mafoko ano mmangwane, mooki, nyenya, mawelana, pega, kolotsana, botshe, seteišene, masiela

**Ikatiso ya ditumatlhaka:** tlhomamisa gore o itse ditumatlhaka tseno š, aa, oo, kg, kw, mm, mp, ng, nk, nn, nt, ny, ph, rr, rw, tl, ts ngw, nny, nth, ntl, nts, tlh, tsw, ntšh

**Ikatiso ya go buisa:** tlhomamisa gore o kgona go buisa mafoko ano senthara, nnye, mmangwane, tlilinking, rremogolo, ntšha, seteišene

Senthara ya Botho e kopile baagi go aba maungo.



Nna le Mme re ya teng. Re aba diapole ka gore ke maungo a re a ratang go feta a mangwe!

Senthara ya Botho ga e kgakala, mme *eish* diapole di boima! E kete ke ka bo ke itse go di rwala ka tlhogo jaaka Mme, kgotsa go di pepa jaaka a pepa nnake wa mosimane!


Ke ipotsa gore di tla jewa ke bomang diapole tse di monate tse?



Nna le Ntate re ya kwa Senthareng ya Botho. Re aba dipiere ka gore ke maungo a re a ratang go feta a mangwe!

Lebokoso la me le le nnye ga le boima mme seroto se segolo sa ga Ntate se tletse dipiere tse di tala.

Ke ipotsa gore di tla jewa ke bomang dipiere tse di matute tse?



Mmangwane ke mooki kwa tlilining. Pele a simolola tiro o tsamaya le rona go ya kwa Senthareng ya Botho. Re aba diphopho ka gore ke maungo a re a ratang go feta a mangwe!

Mme Podile kwa Botho o a re leba a bo a nyenya. 'Leba mawelana a! A na le diphopho tsa mawelana!' a rialo.


Re ipotsa gore di tla jewa ke bomang diphopho tse di monate tse?



Ke ya le Nkoko le Rremogolo kwa Senthareng  
ya Botho. Re aba diperekisi ka gore ke maungo  
a Rremogolo a a go feta a mangwe!

Nkoko o pega sejana sa diperekisi mo godimo ga  
tlhogo. O dira jang? Nako le nako fa ke leka go  
pega sengwe jalo mo godimo ga tlhogo, se a wa.


Ke ipotsa gore di tla jewa ke bomang diperekisi  
tse di monate tse?



Nna le Moruti Jacob re ya kwa Senthareng ya Botho. Re aba magapu ka gore ke maungo a Moruti Jacob a a ratang go feta a mangwe!


Moruti Jacob o a nteba. 'E kete ke ka bo ke na le kolotsana e e jaaka ya gago,' a rialo. 'Magapu ano a boima tota!'

Ke ipotsa gore a tla jewa ke bomang magapu ano a a nang le matute?



Mogolole o simolola tiro e ntšha kwa setešeneng sa mapodisi gompieno. Pele a ya tirong, o ya le nna kwa Senthareng ya Botho go isa maungo teng. Re aba dipeinapole ka gore ke maungo a re a ratang go feta a mangwe! Dipeinapole di a tlhaba! Ka jalo ke di kuka ka pitsa!

Ke ipotsa gore di tla jewa ke bomang dipeinapole tse di botshe tseo tse di monate?




Bona! Go na le bene e kgolo e tala ya Senthara ya Botho. Ke eng fa e eme fa legaeng la masiela? Mme ke eng fa bana botlhe ba tswela kwa ntle?

Badiri ba folosa mabokose a mantsi a maungo – diapole, dipiere, diphopho, diperekisi, magapu le dipeinapole! Botlhe ba a nyenya.

Jaanong re a bona gore di tla jewa ke bomang ... masiela!

Go aba go monate!



# Go aba go monate

## A. Tekothaloganyo

Araba dipotso o dirisa dipolelo tse di feletseng.

1. Batho ba tlisitse mefuta e me kae ya maungo? Kwala lenaane.
2. Lesiela ke mongwe \_\_\_\_\_.
  - a) yo o senang batsadi
  - b) yo o senang bana
  - c) yo o senang bomogolowe le bokgaitسادie
  - d) Tsotlhe tse di fa godimo.
3. Goreng mosetsana a ne a goga legapu ka kolotsana?
4. Goreng mosimane a ne a tshotse dipeinapole ka pitsa?
5. Badiri mo loagong ba ne ba isa maungo jang kwa lagaeng la masiela?
6. Baya sefapaano (X) fa thoko ga dipolelo tse e leng maaka le letshwao (✓) fa thoko ga dipolelo tse di leng boammaaruri.

a) Mabokoso a diapole le a magapu a boima.	
b) Apole e boima go gaisa legapu.	
c) Ga go motlhofo gore mongwe le mongwe a rwale dilo ka tlhogo.	
d) Dintšā, dikatse le dikoko di ja maungo.	

7. Kgang e ne ya supa jang mowa wa ubuntu?
- a) Batho ba ne ba ja maungo a mantsi.
  - b) Batho ba ne ba tlhopha maungo a ba a ratang go gaisa a mangwe.
  - c) Batho ba ne ba aba merogo.
  - d) Batho ba ne ba aba maungo.

## B. Go dirisa puo

DBE Mophato 3 Bukatiro 1: dits 80, 92, 118, 121, 126  
DBE Mophato 3 Bukatiro 2: dits 87, 88

1. Batla mafoko mo kgannyeng a a dirisitsweng go tlhalosa maungo a a farologaneng. Kwala lenaane la mafoko ano.
2. Jaanong tlhopha leungo lepe fela. Thala setshwantsho se segolo sa leungo la gago. Kwala matlhalosi a le mantsi ka moo o ka kgonang ka gone mo setshwantshong sa gago. Akanya ka mmala wa leungo, popego, moutlwalo, le gore go utlwala jang – pele o le ja le fa o ntse o le ja.

## C. A re kwaleng

Goreng go le botlhokwa gore re je maungo?  
Batla tshedimosetso e ntsi ka moo o ka kgonang ka gone gore ke eng fa maungo a re siametse. Kwala tshedimosetso ya gago ka dipolelo tse di feletseng.



# 4. Setshwantsho sa popego



## PELE O BUISA KGANG

**Tlotlofoko:** tlhomamisa gore o itse bokao jwa mafoko ano

botaki, sekgomaretsi, disetensele, diboloko, segolola, motopo, sediko, kgolokwe, khutlotharo, dikhutlonnetsepa, sekwere, motlhape, selopo, mathoko, latedisa, fopholetsa

**Ikatiso ya ditumatlhaka:** tlhomamisa gore o itse ditumatlhaka tseno

aa, ee, oo, kg, kh, kw, mm, mp, ng, nn, ns, ph, th, tl, ts, tw  
ngw, nny, ntl, tlh, tsh, nngw, ntlh, ntsh, tshw

**Ikatiso ya go buisa:** tlhomamisa gore o kgona go buisa mafoko ano

setshwantsho, dikhutlotharo, dikhutlonnetsepa, fopholetsa, motlhape

Bana ba phaposi ya botaki ya ga Mme Tami ba siametse go ka rutwa. Ba na le dipensele, diraba, dirula, dikere, sekgomaretsi le pampiri e tshetlha.

Ba thala dipopego tse di farologaneng gompieno. Mme Tami o lerile diboloko le disetensele gore a ba thuse. A re morago ga moo ba tla segolola dipopego ba bo ba dira setshwantsho. E tla nna setshwantsho sa eng?

Sa ntlha Mme Tami o bolelela bana go thala motopo o mogolo.

‘Popego ya motopo e tshwana le ya lee,’ a rialo.

Bana ba dirisa disetensele le diboloko go ba thusa go thala.

‘A e tla nna setshwantsho sa lee?’ ba a ipotsa.



Morago ga moo Mme Tami o bolelela bana go thala sediko se sennye.

'Sediko se kgolokwe jaaka bolo,' a rialo.


Bana ba dirisa diboloko le meteme le dikhurumelo go ba thusa go thala.

'A e tla nna setshwantsho sa bolo?' ba a ipotsa.



Morago ga moo Mme Tami o bolelela bana go thala dikhutlotharo tse pedi tse dinnye tse di lekanang. 'Khutlotharo e na le matlhakore a mararo,' o gakolola bana jalo, 'jaaka selae sa kuku kgotsa sa *pizza*.'

Bana ba dirisa dirula le diboloko go ba thusa go thala. 'A e tla nna setshwantsho sa selae sa kuku? Kgotsa *pizza*?' ba a ipotsa.



Morago ga moo, Mme Tami o bolelela bana go thala **dikhutlonnetsepa** tse dinnye tse nne tse di lekanang. 'Khutlonnetsepa e na le matlhakore a mane jaaka sekwere,' a rialo, 'mme gopolang gore matlhakore a a lebaneng ke one fela a a tshwanang, jaaka buka kgotsa kgoro.'

Bana ba dirisa diboloko tse dinnye le mabokoso go ba thusa go thala.

'A e tla nna setshwantsho sa kgoro?' ba a ipotsa.



La bofelo, Mme Tami o bolelela bana go thala khutlonnetsepa e le nngwe e telele e e tshesane.

Bana ba thala mola ka go latedisa mathoko a rula go dira popego ya yone.

Jaamong ba na le dipopego di le robonngwe tse di farologaneng mo pampiring ya bone e tshetlha: motopo, sediko, dikhutlotharo tse pedi le dikhutlonnetsepa tse tlhano.

Dipopego tseno tsotlhe di ka dira setshwantsho sefe? Ntlo? Terena? Sekepe?



Mme Tami o naya ngwana mongwe le mongwe pampirinyana e e nang le **sekwere** se segolo se se tala. O kopa bana go segolola sekwere le dipopego tse dingwe tsoatlhe tse ba di thadileng.

Jaanong ba tlile go kopanya dipopego go dira setshwantsho sa phologolo.

Phologolo? E tla nna phologolo efe?



‘Motopo ke mmele,’ Mme Tami a rialo. ‘Sediko ke tlhogo mme dikhutlotharo tse pedi ke ditsebe.

Dikhutlonnetsepa tse nne tse dinnye ke maoto mme khutlonnetsepa e telele e tshesane ke selopo.’

Selopo?

‘E tshwanetse ya bo e le tlou!’ bana ba fopholetsa jalo.

Bana ba kopanya dipopego ka kelotlhoko go dira setshwantsho sa tlou. Ba kgomaretsa dipopego mo sekwereng. La bofelo, ba thala matlho a tlou, molomo le mogatla.

‘Lo dirile sentle, banaka!’ Mme Tami a rialo. ‘Lebang motlhape o mogolo wa ditlou tsa Aforika mo leboteng la phaposi-borutelo ya rona!’





# Setshwantsho sa popego

## A. Tekotlhaloganyo

Araba dipotso o dirisa dipolelo tse di feletseng.

1. O buisitse ka dipopego dife tse di farologaneng mo kgannyeng eno?
2. Bana ba ne ba thala popego efe pele? Ke sejo sefe se se nang le popego eno?
3. Ke dijo dife tse pedi tse di nang le popego ya khutlotharo?
4. Sekwere le khutlonnetsepa di tshwana jang? Di farologana jang?
5. Ke go fitlha leng bana ba neng ba itse gore ba thala tlou?
  - a) Mme Tami o ne a ba bolelela gore e ne e le phologolo.
  - b) Mme Tami o ne a ba kopa go thala sediko.
  - c) Mme Tami o ne a re phologolo e ne e na le selopo.
  - d) Tsotlhe tse di fa godimo.
6. Bana ba ne ba tlhoka dipopego tse kae tse di farologaneng tsotlhe gore ba kgone go dira tlou?
7. Naya dipolelo dinomere go tswa go 1–3 ka tatelano e e siameng.

a) Bana ba ne ba segolola dipopego.	
b) Bana ba ne ba dirisa dipopego go dira tlou.	
c) Bana ba ne ba thala dipopego tse di farologaneng.	

## B. Go dirisa puo

1. Kwala mafoko a a latelang gape ka tatelano ya ditlhaka tsa dialefabete:

sekwere, dipopego, motopo, sediko, khutlotharo, tlou

DBE Mophato 3 Bukatiro 1: ts II  
DBE Mophato 3 Bukatiro 2: dits II, 50, 80, 103

2. Batla maina a mararo le letlhaodi mo polelong e e latelang:

Bana ba dirisa diboloko tse dinnye le mabokoso go ba thusa go thala.

DBE Mophato 3 Bukatiro 1: dits 80, 92, 118, 121  
DBE Mophato 3 Bukatiro 2: dits 87, 88, 104

3. Kwalolola dipolelo o simolole ka mafoko a a fa tlase:

Gompieno bana ba thala dipopego tse di farologaneng.

Maabane \_\_\_\_\_.

Ka moso \_\_\_\_\_.

DBE Mophato 3 Bukatiro 1: dits 42, 84

## C. A re kwaleng

DBE Mophato 3 Bukatiro 1: ts 26

Kwalela tsala lenaane la ditaelo, o mo tihalosetse gore a dire jang tlou a dirisa dipopego. Kwala setlhogo o bo o naya ditaelo tsa gago dinomere. Dirisa kgang eno gore e go thuse.



# ★ Buka 1B

Dibuka tsa go ithuta go buisa tsa Mophato 3 tsa Vula Bula di katisetsa bana go ithuta go buisa ka thelelo ba sa le bannye. Buka nngwe le nngwe e na le ditlhamane di le nne tse di farologaneng, go akaretsa le mokwalo ka dilo tsa mmotata. Pele ga tlhamane nngwe le nngwe, go na le lenaane la mareo a tlotlofoko le lenaane la mafoko a go leng 'thata go a buisa' a go lebeletsweng gore barutwana ba a kgone. Tlhamane nngwe le nngwe e latelwa ke dipotso di le mmalwa tsa tekotlhaloganyo, le ditirwana tsa puo le tsa a re kwaleng tse di golagantsweng le CAPS le Dibukatiro tsa Mophato 3 tsa DBE.



## ★ BUKA 1A

1. Selae sa bofelo sa kuku
2. Ntate o tlhokometse lesea
3. O tlile go dirang jaanong?
4. Tobekano e kana!

## ★★ BUKA 2A

1. Ke leotwana la ga mang le?
2. Neo o kae?
3. Black-mampatile
4. Kganetsano fa gare ga phefo le letsatsi

## ★★★ BUKA 3A

1. Ao, Rre Kgabo!
2. Go reetsa mmino
3. Re baka dikuku le nkoko
4. Bosigo mo polasing

## ★★★★ BUKA 4A

1. Mmutla le Khudu
2. Toropo ya rona
3. Tshoswane le tsiekgope
4. Ke leino la ga mang le?

## ★ BUKA 1B

1. Kausu e e latlhegileng
2. Melekorone
3. Go aba go monate
4. Setshwantsho sa popego

## ★★ BUKA 2B

1. Thusa!
2. Sephiri
3. Segwete se segolo
4. Ke ipaakangeditse leeto

## ★★★ BUKA 3B

1. Ke mang yo o thubileng fenstetere?
2. Lesedi o ya lebenkeleng
3. Sopo ya maje
4. Go nna eng fano?

## ★★★★ BUKA 4B

1. Dikeletso tse tharo
2. Batsoma diphologolo
3. Tau le peba
4. Aforika Borwa wa rona

(le Bukana ya Dikarabo tsa Sekao)

Dibuka tsa go ithuta go buisa mo kगतong eno di na le ditsebe tse di oketsegileng, mokwalo o o oketsegileng mo tsebeng nngwe le nngwe, dipolelo tse di telelenyana, pharologano e kgolwane ya dipaterone tsa dipolelo, puo ya semmuso le puotlhalosi, mmogo le tlotlofoko e kgolwane. Go buisa e nna selo se se itiragalelang fela jaanong, ka boikaelelo jwa go tlhaloganya mo boemong jwa go bitsa mafoko fela /go a peleta fa barutwana ba le gaufi le go buisa ka bobone. Dibuka tseno tsa go ithuta go buisa di ba naya ditshono tsa go buisa ba le sethopho, ba kaelwa, ka bobedi le bobedi le ka bongwe ka bongwe.

# SETSWANA